

# 13

## SA RAWA ME NA DUAVATA TAWAMUDU NA NOQU MATAVUVALE

### IVAKAMACALA TAUMADA VEI QASENIVULI

Ni ko vakarautaki iko vakayalo mo vakatavulica na lesoni oqo, yalovinaka wilika ka vakasamataka na veika oqo:

Sa mai vakayacora rawa na Tamada Vakalomalagi ki na kena vakaduavatataki tiko na veimatavuvale yadua me bula tikoga ni sa oti na bula oqo. Kevaka era sa mai vauci vata na veimatavuvale ena valetabu ka maroroya tiko ena yalodina na ivakaro, sa qai rawa me ra vakaduavatataki vakamatavuvale ki na bula tawamudu ka laki bula vata kei na Tamada Vakalomalagi. (Raica na Maciu 16:19; V&V 138:47–48.)

### VAKAVAKARAU

Kevaka e rawa, vakarautaka mai e dua na itaba ni nomuni valetabu.

### VULI MAI NA ITAVIQARAVI

Tekivu ena dua na itaviqaravi ni veivakasqoni. Me baleta na kena vakasama, raica na tabana e 3.

*Masu* Sureta e dua na gone me cabora na idola masu.

*iYaloyalo* Vakaraitaka e dua na itaba ni valetabu ena nomuni vanua (se vakaraitaka na iyaloyalo e tiko ena tabana e 58. Tukuna vei ira na gone ni oqo na itaba ni dua na valetabu. Vakamacalataka vei ira na itaba oqori, ena nomu dusia na dudukilagi, katuba leka, katuba levu, kei na veika tale eso. Kerei ira me ra cavuta vakarua se vakatolu na vosa “valetabu”. Me ra qai vakatakarakarataka ni ra sa dua na valetabu ena nodra dodoka cake na ligadra ruarua ki dela ni uludra ka laki cokota vata me vaka e dua na dudukilagi ni valetabu.

*Sere* Sureti ira na gone me ra tucake. Lagata se cavuta na qaqa ni sere “I Love to See the Temple” (*Children’s Songbook*, 95) ka matanataka na qaqana e ra. Sureti ira na gone me ra tomani iko.

Na valetabu meu raica. (*cokota vata na ligamuni ruarua me vaka na dudukilagi*)

Au sa na lako kina (*taubale tiko*)

Me’u vakila na Yalo Tabu, (*tara na saremini*)

Me’u vakarorogo ka masu. (*roqo liga*)

Tukuna vei ira na gone ni valetabu sa vale ni Turaga. Sureti ira me ra kaya, “Vale ni Turaga.” Vakamatatataka ni valetabu sa dua dina na vanua e cecere; ena vuku ga ni valetabu, sa rawa me na duavata tawamudu kina na noda matavuvale.

*Malanivosa me Matanataki* Cavuqaqataka na malanivosa me matanataki oqo ka sureti ira na gone me ra tomani iko:

Oqo o Tinaqu. (*laveta cake na ligamu; dusia na nomu idovidovi ni kakana*)

Oqo o Tamaqu. (*dusia na idusidusi*)

Oqo o Taciqu balavu. (*dusia na iqaqalo tura*)

Oqo o Sisita. (*dusia na idrogadrogawale*)

Oqo o Gone lailai. (*dusia na iloloku ni mate*)

Io, keimami sa lomani iratou taucoko vakalevu sara. (*tara na saremini ena ligamuni ruarua*)

*Sere* Lagata se cavuta na imatai ni rua ni qaqa ni italetale ni sere “Families Can Be Together Forever” (*Children’s Songbook*, 188):

Sa rawa me tawamudu na matavuvale (Families can be together forever)

Ena ituvatuva nei Tamada Vakalomalagi (Through heavenly Father’s plan).

Sureti ira na gone me ra cavuta vakarua se vakatolu vakamalua vata kei iko na qaqana oqo.



### IWALEWALE NI VEIVAKAVULICI

*Me kilai:* Mo dau nanuma tiko na ituvaki ni nodra matavuvale kei na nodra itikitiko na gone yadua ena gauna ni lesoni oqo.

*Sere:* Sa rawa mo cakava e dua na lisi ni sere era dau taleitaka na gone me ra lagata, ka me na dau lagati ena veimacawa ena kena gauna ena kalasi ni isususu. Me kena ivakaraitaki, sa rawa me lagati tiko na sere oqo ena gauna era vakatatalo tiko kina na gone, ni se bera se sa oti na vakalomavinaka, se ena gauna era waraka tiko kina na gone na nodra itubutubu. Oqo e dua na sala vinaka ni kena raiclesu na veilesoni sa vakayacori oti.

*iTinitini* Vakamacalataka vakalekaleka na nomu nanuma me baleta na valetabu. Wasea na nomu ivakadinadina ni sa rawa me duavata tawamudu na matavuvale.

*Masu* Sureta e dua na gone me cabora na isogo masu.

## NA ITAVIQARAVI ME DIGITAKI

**VAKAVAKARAU** *Me baleta na malanivosa me matanataki:* Lavetaka ka kotiva laivi mai na iqaqalo ni liga papeti e tiko ena tabana e 59 se vakayagataka na papeti o sa cakava oti tu mai na itaviqaravi me digitaki ena leseni 12. Rokataka na papeti ke gadrevi.

*Me baleta na qito ni kilakila mada:* Lavetaka ka kotiva laivi mai na ituvaki vakaiyaloyalo ni matavuvale e tiko ena tabana e 51 se vakayagataka ga na ituvaki vakaiyaloyalo ko a sa vakarautaka oti tu mai ena leseni 11. Kauta mai e dua na ka me ubi kina na ituvaki vakaiyaloyalo oqo, me vakataka e dua na itutuvi se isulu. Kevaka e rawa, vakarautaka toka mai e dua na itaba ni valetabu ena nomu vanua.



*Me baleta na itaviqaravi ni rokarokataki:* Lavetaka ka kotiva laivi mai na laini momokiti (circle) e tiko ena tabana e 59 me ra yadua na gone. Cula kina e dua na wa e delana e cake ni rua na ka momokiti oqo me dua kina na itaube.

*iTaviqaravi ni iQaqalo ni liga* Tukuna vei ira na gone ni dodonu me da vakavakarau vakavinaka ni bera ni da gole ki na valetabu. Kerei ira me ra dedeka cake e lima na iqaqalo ni ligadra, ka vukei ira me ra vola ena iqaqalo ni ligadra e lima na ka e rawa ni ra vakayacora me ra vakavakarau ki na ilakolako ki na valetabu ni ra sa qasecake mai (o ya na masu, talairawarawa vei ira na nodra itubutubu, lomani ira na tani, gole ki lotu, muria na parofita, kei na so tale). Ena mana sara na itaviqaravi oqo kivei ira na gone qasecake.

*Malanivosa me Matanataki* Vakayacora tale na malanivosa me matanataki e tiko ena tabana e 56, ia mo na vakayagataka kina na iqaqalo ni liga papeti.

*Qito ni Kilakila Mada* Biuti ira ena vuloa na ituvaki vakaiyaloyalo ni matavuvale me toka tikiva na iyaloalo ni valetabu (oqo na kena o sa vakarautaka toka mai se na kena mai na tabana e 58. Ubi ira na ituvaki vakaiyaloyalo oqo ena dua nai tutuvi se isulu. Kauta laivi e dua vei ira na papeti. Cereka laivi na iubi ka taroga vei ira na gone me ra kilakila mada se o cei e sa yali. Ka mo qai biuta lesu tale na ituvaki vakaiyaloyalo o ya ka tukuna vei ira na gone ni sa gadreva dina sara o Tamada Vakalomalagi me ra duavata tawamudu, ka me kakua ni dua e yali. Ena mana sara na itaviqaravi oqo kivei ira na gone qasecake.

*Rokarokataki* Sureti ira na gone me ra rokataka na itaube o sa vakarautaka oti. Ena gauna era rokarokataki tiko kina, mo vakamatatataka tale na ivakavuvuli o ya ni inaki ga ni valetabu, o ya me ra duavata tale kina na matavuvale.



## IWALEWALE NI VEIVAKAVULICI

*iTinitini:* Saga me lekaleka toka ga na itinitini oqo; kena ivakaraitaki: "Au taleitaka na valetabu! Au kila ni sa rawa me duavata tawamudu na matavuvale."

*iQaqalo ni Liga Papeti:* Sa dua dina na vakasama vinaka na kedra dau maroroi mai na iyaloalo, na iqaqalo ni liga papeti, qito, kei na veiyaya tale eso ko sa vakarautaka me baleta na leseni oqo. Sa rawa mo na vakayagataka ki na veileseni e tarava mai se dua ga na gauna ni kalasi ni isususu me raicilesu na ivakavuvuli ko sa vakavulica oti mai.

*Rokarokataki:* Vakayaloqagataki ira na gone me ra laki vakaraitaka na nodra itaube kivei ira na nodra dui matavuvale. Oqo ena rawa ni vukei ira me ra dau nanuma tiko na veika era sa vulica, ka na solia talega e dua na gauna kivei ira na itubutubu me ra veivosakitaka kina vata kei ira na luvadra na ivakavuvuli ni leseni. (Raica na *Veituberi, Me iLutua Ni Nada Bula*, 214.)





Lavetaka na tabana oqo ka kotiva laivi mai na iqaqalo ni liga papeti ka tiko ena laini kaukauwa ka dodonu. Lobika na laini cacavukavuka. Ka mo qai tepitaka na tutuna, ka me galala tu kina na botona e ra me rawa kina vei ira na gone me ra daramaka ki ligadra na papeti.

